

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ الْأَلَاةِ مُحَمَّدٌ رَسُولُ اللَّهِ

## **KHUTBA JUMMAH**

**HADHRAT MUHYI-UD-DIN AL-KHALIFATULLAH**

**MUNIR AHMAD AZIM**

23 Août 2019

21 Dhul-Hijjah 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

### **LE PACTE D'ALLAH ENVERS POSTÉRITÉ IBRAHIM (AS)**

Dans plusieurs places dans Quran et Tawraat fine ena mention de bane méchancetés et de manque de foi de bane Juifs, kot fine mette l'emphase couma zot fine déshonore zot pacte.

Dans Ancien Testament (Chapitre Esaïe) ena sa verset là : « *La terre fine infectée par la corruption de so bane habitants, parski zot fine viole so bane la lois, zot fine change bane commandements et parski zot fine casse sa pacte ki ti bizin durer éternellement là.* » (Esaïe 24 : 5).

Le Quran Shareef dire : « **Bane ki ti vine infidèles parmi bane zenfants d'Israël fine maudit par la bouche de David et de Jésus fils de Marie, parski zot fine vine rebelles, et ki zot fine transgresse [tous bane limites].** » (Al-Maida 5 : 79).

Après Hazrat Musa (as) – Moïse, fine ena bocou bane prophètes parmi bane Israélites. Dans ene Hadith, Hazrat Muhammad (saws) fine dire : « *Chaque fois ki ene prophète ti pé mort, ene l'autre prophète ti vini pou remplace li (comme so successeur).* » (Bukhari).

Quand bane Israélites fine dépasse tous bane limites dans zot bane transgressions, après Hazrat Dawud (as), Allah fine rasse avec zot la royauté de sa le monde là, et Li fine aussi rasse de zot l’apostolat (*Nabuwwah*) après la venue de Hazrat Isa (as). L’heure ti arriver pour enlève sa de zot et transfère sa *Nabuwwah* là de bane Juifs – le peuple Juifs – et donne sa à bane les autres, parski malgré ki sa bane là ti bane descendants de Hazrat Ibrahim (as), mais selman zot ti vine méchant (*Zaalim*).

Hazrat Isa (as) – Jésus – ti dire à so bane disciples ki ene l’autre peuple pou alle gagne sa *Nabuwwah* là. Li fine dire : « *C’est pourquoi mo pé dire zot ki le royaume de Dieu pou enlever de zot, et pou donne sa à ene peuple ki pou rapporte so fruits [ki pas pou ingrat, ki pou conne so valeur]. Celui ki pou alle tombe lor sa roche là pou crazé, et li pou écrase celui lor ki li alle tomber.* » (Matthieu 21 : 43-44).

Quran Shareef aussi faire allusion à sa dans sa verset là : « **Li pou le signe de l’approche de l’Heure. Pas ena aucaine doute lor là ; suive-moi, parski c’est sa le chemin droit.** » (Az-Zukhruf 43 : 62).

Le Saint Prophète de l’Islam, Hazrat Muhammad (saws) fine dire : « *Ô bane Juifs ! Jésus fils de Marie ti le signe de sa l’Heure ki zot ti dire là. Le fait ki zot pas fine accepter le Messie ki ti bizin redonne zot bane faveurs de la royauté et de l’apostolat, donc zot pou être détruits. Sa deux faveurs là pou être maintenant accordé à bane les autres. Pas ena aucaine doute lor sa l’Heure là. Suive-moi maintenant, parski c’est sa le chemin droit. Quand zot pou suive moi, zot [en étant musulmans] pou régagne sa deux faveurs ki ti donner à la postérité d’Ibrahim (as).* »

Donc, Allah fine abandonne bane fils (zenfants) d’Israël pour tourne Li vers bane fils (zenfants) d’Ismaël. C’est sa Ismaël là ki ti pé vive avec so mama dans le désert de Faraan (Genèse 21 : 21). Nous pou trouver ki Hazrat Ibrahim (as) fine bizin passe par trois épreuves. Li fine accepter pou ki bane idolâtres jette li dans difé ; li fine abandonne so madame Agar (Hajra) et so garçon Ismaël dans ene désert avec beaucoup difficultés; et plus grand épreuve ki li fine bizin passer et ki li fine sorti victorieux c’est ki li fine prépare li, lor l’ordre d’Allah pou offert so garçon en sacrifice. Des milliers de félicitations pour Hazrat Ibrahim (as) et so garçon Hazrat Ismaël (as) ki zot fine montré zot tellement fermes dans le chemin de zot Seigneur

(Allah) et ki zot fine soumette zot entièrement à So volonté ! C'est alor, kan li ti prépare li pou sacrifier so garçon ki sa l'ordre là vini du Trône du ciel, c'est-à-dire, d'Allah, kot sa la voix là dire : « *Mo pou béni zot, et Mo pou multiplier zot race couma bane z'étoiles dans le ciel et couma di sable ki trouve lor le rivage de la mer. Zot postérité pou possède bane la villes de so bane l'ennemies. Parmi tous bane nations de la terre, c'est sa bane ki pou sorti de zot là ki pou béni parski zot fine obéir Mo la voix.* » (Genèse 22 : 17-18).

Après sa Hazrat Ibrahim (as) et Ismaël (as) fine construire Ka'aba ki pou vine dans le future le lieu de naissance du Saint Prophète de l'Islam à travers qui tous bane nations pou être béni, et ki pou vine le centre religieux du monde entier. Le fruit de bane *duahs* de Hazrat Ibrahim c'était le fils promis, Ismaël, et c'est en so faveur – en faveur d'Ismaël et de so bane descendants – ki Hazrat Ibrahim (as) ti faire *duahs* après ki zot fine érige (construire) Ka'aba.

En bref, l'heure ti arrivée pour ki le *Rahmatul-lil-Aalameen* vini pou bénir tous bane nations, ene tel dimoune ti bizin vini ki pou ene manifestation d'Allah, et ki, accompagné de dix milles saints, et portant dans la main droite la loi de feu, li ti pou débarrasse Ka'aba ainsi ki le monde entier, de l'idolâtrie.

« *Et voici la prédiction ki Moïse, l'homme de Dieu fine faire à bane zenfants d'Israël avant so la mort. Li fine dire : 'Le Seigneur fine vini de Sinaï sur le Mont Faraan, et dix mille saints avec li. Li ena dans so la main droite la loi de feu.'* » (Deutéronome 33 : 1-2).

Ô mo bane frères musulmans ! Rappel zot ki nous bane zenfants promis d'Ibrahim (as). Ena bane grands promesses ki Allah fine faire à nous l'égard. Allah fine faire nous le meilleure de tous bane nations/ communautés (*Khair-e-Ummat*). Li fine donne nous ziska la fin du temps le perfectionnement de bane faveurs temporelles (c'est-à-dire, ki concerne sa la terre ici-bas là) sous forme de la royauté et aussi le perfectionnement de bane faveurs spirituelles sous formes de l'apostolat, parski nous sorti de la postérité d'Ibrahim (as). Li (Allah) fine dire : « **La religion de zot papa Ibrahim. Li fine nomme zot musulmans.** » (Al-Haj 22 : 79).

Allah fine tenir promesse ki Li fine faire à la postérité d'Ibrahim (as) de branche ki sorti d'Israël, tanque ki sa bane là pas ti méchant, et alor Li ti réserve pour zot le

ystème de royauté et de l'apostolat. Mais quand zot fine vine *Zaalim*, Allah fine tourne Li vers la postérité d'Ismaël (as), c'est-à-dire, bane musulmans.

Donc, si bane musulmans pas vine méchants, li nécessaire ki bane prophètes vine de parmi zot [ki bien-sûr pas pou amène aucaine la loi ki contre la loi parfait et finale d'Allah – le Quran]. Voilà pourquoi le Saint Prophète Muhammad (saws) fine annonce l'arrivée d'ene Messenger après li ki pou « *Imamakum Minkum* » (Ou chef de parmi ou-mêmes). Mais comment se fait-il ki bane *Ulémas* ignore sa ? Kifaire zot prétendre ki l'apostolat dans l'Islam fine supprimé complètement et par ce fait, sa bane *Ulémas* là fine place bane musulmans au même rang ki bane Juifs, kot, sa bane là (bane Juifs) ti attire la colère d'Allah lor zot, et kot alor Allah fine enlève le privilège de l'apostolat de zot ?

Au contraire, bane musulmans zot, depuis Hazrat Muhammad (saws), le groupe de bane récompensés (*Munam Alaihim*) et pas capave compare zot (nous, bane musulmans) à bane ki fine maudits (*Maghzi Alaihim*) et ki fine égarer (*Zwaalline*).

N'étant pas sous le coup d'ene punition divine couma bane Juifs, bane musulmans bizin continuer trouve bane prophètes [ki non-porteurs de lois bien-sûr !] susciter de parmi zot-mêmes. Pour maintenir sa bénédiction là, Allah fine enseigne ene *duah* ki trouve dans Surah Al-Fatiha, le premier chapitre du Quran Shareef même. Lire li attentivement, et zot pou trouver ki fine faire mention de sa sujet ki mo fine fek explique zot là, kot Allah mentionne deux groupes ki fine perdi la bénédiction divine, c'est-à-dire, bane Juifs et bane Chrétiens. Li enseigne à bane musulmans pou pas vine *Maghzi Alaihim* (maudit) et *Zwaalline* (égaré), mais pou suivre le chemin ki bane zenfants Ibrahim bizin suivre, c'est-à-dire, le chemin ki pou attirer lor zot la bénédiction divine. Allah mette sa *duah* là clair dans le Quran Shareef :

**« Garde-nous lor le droit chemin, le chemin de bane ki To fine combler de To bane faveurs, non pas chemin de bane ki fine attire To colère, ni de bane ki fine égaré. »** (Al-Fatiha 1 : 6-7).

Si Allah ti arrête l'apostolat, kifaire Li fine enseigne bane tels *duahs* pour obtenir sa même faveur là ? Sa promesse là ti faire à Hazrat Ibrahim (as), et à travers li, à bane israélites, mais kan sa bane là fine vine méchants, c'est bane zenfants d'Ismaël ki fine gagne sa faveur là. Pas fine jamais écrire aucaine part ki la

promesse d'Allah ki Li ti faire à Hazrat Ibrahim (as) fine révoqué, ni ki la race (descendance) de Hazrat Ibrahim (as) fine vine entièrement méchant. Allah pas pou capave réprend So promesse excepter dans le seul circonstance kot bane zenfants de Hazrat Ibrahim (as) pou vine méchants ou quand Li-même (Allah) pou déclarer ki sa promesse là astaire népli tenir deboute.

La prière (*duah*) ki fine enseigné dans Surah Al-Fatiha li de caractère prophétique. Tout comme celui ki le Saint Prophète Muhammad (saws) aussi fine enseigne nous et ki trouve dans le *Darood Shariff* suivant (c'est-à-dire, le *Darood Ibrahim*) :

*« Ô Allah ! Envoye To bane faveurs lor Muhammad (saws) et lor so famille pareil couma To ti envoye bane faveurs lor Ibrahim (as) et lor so famille ; assurément To digne de louanges et glorieux.*

*Ô Allah ! Envoye To bane bénédictions lor Muhammad (saws) et lor so famille pareil couma To ti envoye bane bénédictions lor Ibrahim (as) et lor so famille ; assurément To digne de louanges et glorieux. »* (Bukhari).

Ki ti bane faveurs et bénédictions ki Hazrat Ibrahim (as) et so la famille ti recevoir ? Eski c'est pas la royauté du point de vue temporel (c'est-à-dire, de sa le monde ici-bas là), et l'apostolat du point de vue spirituel ? C'est sa bane mêmes faveurs et bane mêmes bénédictions là ki l'Ummaté Muhammadiyya fine apprane pou demander à travers bane *Daroods*. Li bien étrange ki, d'ene côté bane Mullahs mette ene frein à l'apostolat, fine arrête l'apostolat et de l'autre côté zot pé prier pour demande sa même kitchose ki zot fine arrête croire là. En vérité, zot pé trompe bane dimounes. Sa bane Mullahs là zot chagrins ki c'est sa humble serviteur là ki Allah fine choisi comme So Khalifa (Khalifatullah) et prophète et non pas zot-mêmes. Mais sa décision là pas ti trouve dans mo la main sa. Allah donne le royaume à celui ki Li envie. Li faire celui ki Li envie vine ene prophète. **« Allah conne mieux kot Li bizin place So mission. »** (Al-Anam 6 : 125).

C'est à réfléchir ki bane musulmans pé faire bane zefforts continuel pour recevoir le royaume de la terre et kan alor zot pas gagne li, zot alle désespéré, tandis ki le royaume d'ici-bas li seulement temporaire. Même si nous pas gagne sa, alor li pas grave ditout. Pas pou ena aucaine mauvais conséquences à cause de sa. Mais si nous pas obtenir la bénédiction spirituelle, alor c'est tout l'avenir ki en danger parski l'égarement risse dimounes vers la perdition, vers l'enfer.

Donc, si ene prophète vini pour éloigne sa l'égarement là et pou remette le monde lor le bon chemin, alor c'est sa le vrai but de la vie, et ainsi l'homme pour réussi dans sa le monde là et dans l'autre monde aussi.

Ki Allah garde nous lor le droit chemin, et préserve nous dans le groupe de *Munam Alaihim* (de bane récompensés). *Ameen !*

## ANNONCE

Après bane révélations ki mo ti recevoir le Mercredi 05 Décembre 2018 à Mathra (Kerala) dans Masjid Noor'ul Islam en Mandarin, kot Allah ti faire comprendre ki dans les jours à venir bane tels l'évènements pou passer à travers le monde entier ki pou bien grave, et Allah aussi fine révèle la haine ki Narendra Modi, Donald Trump et le Président de la Chine entre autres ena (concernant bane conflits et la haine ki zot ena pour l'Islam) et dans sa bane révélations là ti ena aussi la mention de bane glissements de terrain, inondation, cyclones, et bane plusieurs les autres problèmes à travers le monde entier.

**Le Grand Conflit dans Cachemire :** Depuis Lundi le 05 Août 2019, bane l'autorité indiens fine démontrer ene visage bien sombre dans zot l'histoire, ene blackout complet de la démocratie. Le passage en force du Premier Ministre Indien Narendra Modi lor la révocation de l'autonomie de Cachemire ki diriger par l'Inde li ene pari à haut risque ki capave réhausse sa grand gouffre de séparation ki déjà en place depuis tant d'années et kot sa capave envenime (aggrave) bane tensions avec Pakistan aussi.

En résumé, d'après l'agence indien PTI, bane forces [l'armée] indiens dans Cachemire fine être placer en alerte maximale vendredi 09 Août 2019, jour de prière [Jumma] pour bane musulmans, kot li fine cite ene responsable de la sécurité à Srinagar, capitale d'été de l'État de Jammu-et-Cachemire du statut constitutionnel spécial de Jammu-et-Cachemire, ki ene l'État du nord de l'Inde kot la majorité de bane dimounes zot bane musulmans, et alor, sa décision terrible du gouvernement indien pou implémente sa projet là fine amène ene vague de panique dans l'État de Jammu-et-Cachemire depuis réélection de sa gouvernement là en Mai.

L'État de Jammu-et-Cachemire li l'entité administratif de la partie de Cachemire ki contrôlé par l'Inde, kot ene tiers environ de so région de l'Himalaya là li contrôlé par Pakistan. Sa deux puissances nucléaires d'Asie du sud là pé revendique sakaine de zot côté so droit lor Cachemire ki ti divisé entre sa deux là et depuis plus ki 70 ans, ena bane grands tensions militaires et diplomatiques entre sa deux pays là, surtout depuis la partition de l'empire colonial britannique des Indes en 1947. Avec 12,5 millions d'habitants lors du recensement de 2011, Jammu-et-Cachemire li seule région à majorité musulmane ki l'Inde contrôlé. Li composé de la vallée de Srinagar kot ena ene forte présence de bane musulmans là-bas, kot Srinagar li le cœur de sa région là.

D'après bane habitants de Srinagar, zot fine perdi tout l'espoir, dans démocratie indien. Le gouvernement nationaliste hindu de Premier Ministre Narendra Modi, dans Parlement, après bane préparatif ki li fine faire dans le plus grand secret, fine révoque l'autonomie constitutionnelle de Jammu-et-Cachemire et fine faire vote so dislocation [cassure, séparation], ene kitchose ki l'Inde ti prévoir pou faire depuis trente ans ; kot li ti envie envahir Jammu-et-Cachemire et ena tout contrôle lor là.

Pakistan de so côté fine annoncé ki li pou expulser l'ambassadeur indien à Islamabad et pou suspendre commerce bilatéral avec l'Inde.

Li (Pakistan) ouler amène sa question du Cachemire là devant bane instances internationales. Premier Ministre Pakistanais, Imran Khan, fine faire sa l'annonce là après la révocation par l'Inde de l'autonomie constitutionnelle de la partie du Cachemire ki li (l'Inde) pé contrôler. Et alor Premier Ministre Pakistanais, Imran Khan fine revendiquer devant bane parlementaires pakistanais: « *Nous pou combatte sa (mesure) là devant tous bane instances y compris au conseil de sécurité de l'ONU.* » Et li fine ajouter ki so gouvernement ena l'intention aussi ena recours à la cour pénale internationale.

Saki mo capave dire c'est ki la situation li bien critique, et nous bizin faire *duahs* ki bane Kashmiris, dans l'état de Jammu et Cachemire zot regagne zot pays en entier, et ki ni l'Inde ni Pakistan rode zot part dans sa pays là. Mo faire *duahs* ki Kashmir révine pour bane Kashmiris sans ki l'Inde ou Pakistan rode zot boute gato là-dans. Avant tout, Kashmir c'est pour bane Kashmiris. Pareil couma l'Inde c'est pour bane Indiens, ki li ene indien musulman, hindou ou chrétien, et non pas pour

Pakistan, et ki Pakistan li pour bane Pakistanais, même si sa bane là bane musulmans, hindous ou chrétiens, alor justice bizin faire comme il faut.

Ici, comme bane Mauriciens, eski nous ti pou content ki lotte lotte vine rode so boute dans nous ti l'île Maurice ? Kot finalement couma sa chameau là rode rentre dans la tente, boute par boute, alor propriétaire ki alle trouve li dehors. Azordi le monde pé cause la démocratie mais personne pas pé implémente li dans so façon ki bizin. L'État de Jammu-et-Cachemire content zot l'autonomie, et l'Inde pé fer *Zulum* lor zot, et pé boycotte zot dans plusieurs façons.

Ki Allah aide bane habitants de Jammu-et-Cachemire, ki li so musulmans, hindous et chrétiens et bane les autres la foi aussi, afin ki zot ré-gagne zot bane droits et ki *Insha-Allah*, Allah montrer So support envers la vérité et anéantir tous bane faussetés et complots malveyants de bane malfaiteurs. *Insha-Allah, Ameen*.

**Dans Birmanie :** Fine ena ene glissement de terrain ki fine provoqué par la mousson dans l'est de la Birmanie ki fine faire plisse ki 51 morts, et bane secouristes pé contigne recherche bane disparus en conséquences de sa glissements terrain là.

**Dans La Chine :** Le bilan de bane victimes ki fine provoqué par le typhon *Lekima* dans l'est de la Chine fine faire plisse ki 45 morts, alors ki bane sauveteurs pé cherche bane disparus et plus ki ene million d'habitants fine bizin évacué suite à sa calamité là.

**Dans L'Inde :** Bane inondations pé continuer ravage l'Inde. Alor ki bane l'États de Karnataka et de Kerala, dans le sud du pays, pé faire encore face à bane destructions, le nord de l'Inde pé prépare zot maintenant au pire.

Jusqu'à présent, six l'États fine touché par bane inondations: Gujarat, Kerala, Karnataka, Maharashtra, Uttarakhand et Himachal Pradesh. Au moins 251 fine morts et plisse ki 20 dimounes fine porter disparu dans bane l'États du nord de l'Inde, Himachal Pradesh, Uttarakhand et Maharashtra, et plusieurs milliers de bane dimounes fine évacué.

L'Humanité pé faire face bane très grand problèmes. L'Humanité pé souffert, et nous, en tant ki humains, et aussi et spécialement en tant que musulmans, ki

l'avenir du monde repose lor nous bon sentiment, c'est nous ki bizin donne le meilleur exemple, et aider pour la construction d'ene le monde meilleure. L'humanité c'est nous, et si l'humanité souffert, nous souffert. Nous faire *duahs* ki Allah gagne pitié de nous tout, comme ene sel nation, et ki dimounes comprend ki prend le chemin travers pas amène aucaine bien. Au contraire, sa amène seulement la haine, la destruction et la désolation. Alor, nous faire nous mieux pou aide nous prochain et nous faire nous Dawa pour ki le monde conne So vrai Dieu et pou tourne vers Li et adore Li et faire le bien ki pou rende li proche avec so Créateur. *Insha-Allah, Ameen.*